

**MINISTARSTVO
OBRAZOVANJA, NAUKE, MLADIH,
KULTURE I SPORTA**

715

Na osnovu Zakona o organizovanju i djelokrugu kantonalnih ministarstava i drugih tijela kantonalne uprave Srednjobosanskog kantona („Službene novine Srednjobosanskog kantona“, broj: 5/12 i 7/12 – ispravka teksta), ministar obrazovanja, nauke, kulture i sporta donosi

**PRAVILNIK
O TAKMIČENJU I SMOTRI UČENIKA
OSNOVNIH I SREDNJIH ŠKOLA****DIO PRVI – OPĆE UPUTE****Član 1.****(Takmičenje i smotra)**

(1) Takmičenje je pravilima određen postupak iskazivanja sposobnosti, vještina i znanja učenika u pisanom ili usmenom obliku, pojedinačno ili u grupi, u skladu s odobrenim nastavnim planom i programom (NPP) u Srednjobosanskom kantonu (u daljnjem tekstu: Kanton).

(2) Smotra je predstavljanje postignuća u vještinama i umijećima učenika.

Član 2.**(Pravo učešća)**

Na takmičenju i smotri učestvuju učenici koji se kao pojedinci ili članovi određene grupe ističu znanjem, vještinama ili sposobnostima u skladu s programom / pravilima pojedinog takmičenja ili smotre.

DIO DRUGI – CILJEVI TAKMIČENJA I SMOTRE UČENIKA**Član 3.****(Ciljevi takmičenja i smotre)**

Ciljevi takmičenja i smotre učenika su:

a) poboljšanje djelotvornosti škola i obrazovnog sistema u Kantonu;

b) omogućavanje učenicima da primijene stečena znanja, sposobnosti i vještine iz određenih oblasti te poticanje produktivnih znanja;

c) afirmacija najkvalitetnijih rezultata postignuća učenika i nastavnika u osnovnim i srednjim školama, kroz razna takmičenja, kroz redovnu i izbornu nastavu, te slobodne aktivnosti;

d) uspješno stvaranje profesionalne zajednice onih koji uče, koji ulažu sve svoje napore i resurse kako bi omogućili svakom učeniku da napreduje i razvija svoje pune potencijale;

e) širenje i popularizacija znanja i sposobnosti učenika;

f) razvijanje učeničkih potencijala, otkrivanje darovitih učenika i pružanje mogućnosti da iskažu snagu svoga talenta te steknu nove kompetencije i odgovornosti;

g) uvođenje učenika u samostalni istraživački i stvaralački rad i razvoj te vještine učenja;

h) razmjena iskustava između škola i uključenje u procese koji povećavaju učenje učenika i nastavnika;

i) pripremanje učenika za život, samostalnost, samopouzdanje i komunikacijske vještine te upoznavanje i druženje učenika iz različitih škola i sredina.

DIO TREĆI – ORGANIZATORI I NIVOI TAKMIČENJA I SMOTRI UČENIKA**Član 4.****(Organizatori takmičenja i smotri)**

Organizator takmičenja i smotri učenika može biti:

a) Ministarstvo obrazovanja, nauke, kulture i sporta (u daljnjem tekstu: Ministarstvo);

b) škola;

c) općina;

d) strukovno udruženje, pedagoška ustanova / zavod;

e) stručni aktiv nastavnika pojedinih predmeta;

f) nevladina organizacija;

g) drugi zainteresovani subjekti.

Član 5.**(Nivo takmičenja i smotre)**

Takmičenje i smotra učenika provode se:

a) na školskom nivou;

b) na općinskom / međuopćinskom nivou;

c) na kantonalnom / međukantonalnom nivou;

d) na federalnom nivou;

e) na državnom nivou;

f) na međunarodnom nivou (na evropskom nivou i na olimpijadi).

DIO ČETVRTI – KANTONALNI PLAN I KALENDAR TAKMIČENJA I SMOTRI UČENIKA**Član 6.****(Termini izrade kantonalnoga plana i kalendara)**

(1) U skladu s odobrenim NPP-ima, kantonalnim planom i kalendarom školskih takmičenja i smotri učenika, navedene aktivnosti utvrđuju se i planiraju godišnjim planom i programom rada škole (GPR) za narednu kalendarsku godinu.

(2) Plan i kalendar općinskih i kantonalnih takmičenja i smotri učenika (predmeti i takmičarske discipline) utvrđuje Ministarstvo do kraja novembra tekuće školske godine za slijedeću kalendarsku godinu te ga objavljuje na svojoj mrežnoj (web) stranici.

(3) Plan i kalendar takmičenja i smotri viših nivoa od kantonalnog utvrđuje organizator (Ministarstvo, strukovno udruženje za određeni predmet, nevladina organizacija, pedagoška institucija i sl.) te treba pravovremeno dostaviti Ministarstvu na uvid prijedlog svojih termina takmičenja, najdalje do 15. novembra tekuće kalendarske godine radi planiranja kantonalnih takmičenja i smotri za slijedeću kalendarsku godinu.

(4) Škole su dužne, u skladu s NPP-om koji realizuju, u svome GPR-u planirati školska takmičenja i smotre te učestvovati u njima.

(5) Uz plan takmičenja, organizator takmičenja je dužan uraditi i dostaviti finansijski plan i troškovnik takmičenja.

Član 7.

(Termin održavanja takmičenja)

(1) Takmičenja i smotre učenika osnovnih i srednjih škola održavat će se prema sljedećem kalendaru:

- a) školska takmičenje – tokom februara;
- b) općinsko / međuopćinsko takmičenje – tokom marta;
- c) kantonalno / međukantonalno takmičenje – tokom aprila;
- d) federalno takmičenje – u skladu s utvrđenim terminima organizatora;
- e) državno takmičenje – u skladu s utvrđenim terminima organizatora;
- f) međunarodno takmičenje – u skladu s utvrđenim terminima organizatora.

(2) Školska takmičenja učenika, odnosno općinska takmičenja učenika, prema određenom NPP-u za pojedino područje, održavaju se istoga dana u svim općinama u Kantonu, o čemu će Ministarstvo obavijestiti škole.

Član 8.

(Sadržaj kalendara takmičenja i smotri)

(1) Kalendar takmičenja i smotri učenika sadrži sljedeće podatke:

- a) datum, dan i sat početka svakog nivoa takmičenja i smotre učenika;
- b) mjesto i školu / domaćina takmičenja i smotre učenika;
- c) rok prijave za pojedini nivo takmičenja i smotre učenika.

(2) Sve izmjene i dopune kalendara takmičenja i smotri učenika provode se uz prethodnu saglasnost Ministarstva.

DIO PETI – TEHNIČKA ORGANIZACIJA TAKMIČENJA I SMOTRI UČENIKA

Član 9.

(Domaćin takmičenja i smotre)

(1) Školsko takmičenje i smotru učenika organizuje i provodi škola i školski stručni aktivni nastavnika pojedinih predmeta, prema kalendaru takmičenja učenika.

(2) Općinsko takmičenje i smotru učenika provodi jedna od škola (domaćin) koju imenuje Ministarstvo, na prijedlog aktiva direktora škola.

(3) Kantonalno takmičenje učenika organizuje Ministarstvo osnivanjem komisije (za određeni NPP i područje) i imenovanjem jedne škole domaćinom takmičenja, na prijedlog aktiva direktora škola.

(4) Federalno, državno i međunarodno takmičenje i smotra učenika organizuju i provode strukovno udruženje ili nevladina organizacija ili pedagoška institucija, prema kalendaru takmičenja učenika, čiji je poziv pravovremeno dostavljen na prethodnu saglasnost Ministarstvu, najkasnije do kraja marta tekuće školske godine, da bi se učenicima pobjednicima i ekipama odobrilo daljnje takmičenje i smotra na višem nivou.

(5) Poziv i dnevni red uređuje i dostavlja organizator takmičenja i smotre na nižem nivou, a na kantonalnom nivou, poziv i dnevni red dostavlja Ministarstvo u dogovoru s domaćinom kantonalnog takmičenja i smotre.

Član 10.

(Prijavnica za takmičenje i smotru)

(1) Učešće učenika i njihovih nastavnika / mentora na određenom nivou takmičenja i smotre, škola će prijaviti komisiji određenog nivoa takmičenja ili smotre na propisanoj prijavnici, koja je sastavni dio ovoga pravilnika.

(2) Prijavnica mora biti dostavljena nadležnoj komisiji najkasnije do dana utvrđenog pravilima, odnosno programom pojedinog takmičenja ili smotre, u pravilu elektronskom poštom, iznimno poštom ili telefaksom.

(3) Za tačnost podataka u prijavnici odgovorna je škola, odnosno direktor škole.

(4) Nepotpune i nečitko ispisane prijave komisija neće prihvatiti.

Član 11.

(Obavješćavanje sredstava javnog saopćavanja)

Škola domaćin, u saradnji s organizatorom i nadležnom komisijom, obavezno obavješćava sredstva javnoga saopćavanja o takmičenjima i smotrama koje organizuje u svojoj sredini.

Član 12.

(Saglasnost Ministarstva za takmičenje i smotru)

(1) Učenici osnovnih i srednjih škola mogu učestvovati na državnom i međunarodnom takmičenju i smotri uz prethodnu saglasnost Ministarstva.

(2) Određene specifičnosti za učešće učenika na takmičenju duhovnog i nacionalnog obilježja, u odnosu na određeni nastavni plan i program te GPR škole (učači Kur'ana, dani kruha, nacionalna kulturna baština, ekokviz i sl.), organizuju i provode direktori škola, uz prethodnu saglasnost Ministarstva.

Član 13.

(Donošenje propozicija takmičenja i smotre)

Propozicije takmičenja i smotre učenika donosi organizator takmičenja i smotre, uz prethodnu saglasnost Ministarstva, a objavljuju se istovremeno kada i kalendar takmičenja učenika.

Član 14.

(Učešće na takmičenju i smotri)

(1) Redovni učenici osnovnih i srednjih škola mogu učestvovati na takmičenjima i smotrama učenika, pojedinačno ili kao članovi ekipe.

(2) Jedan učenik se može takmičiti kao pojedinac ili član ekipe u više disciplina.

(3) Ekipni plasman škole dobije se na osnovu zbira bodova triju najboljih učenika jedne škole.

(4) Učešće učenika na takmičenju je dobrovoljno.

Član 15.

(Kriteriji učešća na takmičenju i smotri)

(1) Školsko takmičenje se organizuje za sve učenike škole koje, prema takmičarskim kriterijima, prijave njihovi nastavnici / mentori.

(2) Ako u općini djeluje samo jedna škola koja radi na određenom NPP-u, njeni predstavnici se direktno plasiraju na kantonalni nivo takmičenja iz određenoga područja.

(3) Dvije škole i više škola u općini u kojima se nastava izvodi na istom NPP-u organizuju zajedno općinsko takmičenje, s ciljem dobivanja pobjednika iz određenoga

područja na općinskom nivou koji se plasira na kantonalni nivo.

(4) Broj učenika na takmičenju i smotri na općinskom nivou, pojedinačno ili ekipno, u skladu je s propozicijama takmičenja.

(5) Na federalnom, državnom i međunarodnom nivou takmičenja i smotri mogu učestvovati učenici prema rezultatima postignutim na kantonalnom nivou, tj. prema ljestvici poretka u skladu s određenim NPP-om pojedinoga područja.

(6) Popis pozvanih učenika objavljuje se na mrežnoj stranici Ministarstva te se objavljeni popis ujedno smatra i javnim pozivom na federalni, državni i međunarodni nivo takmičenja i smotre, pa se učenici neće dodatno pozivati pisanim pozivom na adresu škole.

Član 16.

(Dostavljanje rezultata s takmičenja i smotre)

Organizator / domaćin nižeg nivoa takmičenja i smotre učenika (školskog, općinskog) obavezan je kantonalnoj komisiji iz člana 9. ovoga pravilnika, u roku od pet dana nakon održanog takmičenja i smotre učenika, dostaviti rezultate s potrebnim podacima:

- a) ime i prezime učenika, odnosno popis članova ekipe;
- b) naziv škole i mjesto;
- c) broj osvojenih bodova, odnosno plasman na takmičenju i smotri;
- d) ime i prezime predmetnog nastavnika / mentora učenika ili ekipe.

Član 17.

(Dostavljanje dokumentacije Ministarstvu)

Nakon održanoga kantonalnog takmičenja i smotre, u roku od dva dana, komisija dostavlja Ministarstvu dokumentaciju iz koje se vide: rezultati i ljestvica poretka, imena pojedinaca ili nazivi ekipa za viši nivo takmičenja i smotre učenika (federalno, državno ili međunarodno) te ih objavljuje na mrežnoj stranici Ministarstva.

Član 18.

(Trajanje takmičenja i smotre)

(1) Na školskom, općinskom i kantonalnom nivou takmičenja učenici rade test, odnosno rješavaju zadatke iz teoretskih nastavnih područja.

(2) Vrijeme izrade testa ili zadatka na kantonalnom nivou takmičenja učenika je 120 minuta, a na nižim nivoima takmičenja 90 minuta.

(3) Takmičenje učenika u sportu, u muzičkoj i likovnoj umjetnosti, te u građanskom obrazovanju za demokraciju i ljudska prava, kao i određene smotre održavaju se prema posebnim pravilima / propozicijama koje se dostavljaju Ministarstvu na odobrenje najkasnije 60 dana prije početka određenog takmičenja i smotre.

(4) Takmičarska komisija određuje vrijeme posebno za izvođenje eksperimenata, praktičnih radnih operacija i produkcija te za prezentaciju radova.

Član 19.

(Izrada i bodovanje testova, odnosno zadataka)

(1) Testove, odnosno zadatke za školsko takmičenje učenika priprema stručni aktiv nastavnika.

(2) Testove, odnosno zadatke za općinsko takmičenje učenika osigurava općinska komisija, u skladu s određenim NPP-om.

(3) Komisiju koju imenuje Ministarstvo čini po jedan predstavnik / mentor iz određenoga područja škole učesnice, a zadatke / testove izrađuje na osnovu prikupljenih prijedloga koje mogu dostaviti: škola, pojedini nastavnik, pedagoška ustanova, strukovno udruženje, nevladina organizacija i sl., uz poštovanje tajnosti.

(4) Testove, odnosno zadatke za kantonalno takmičenje učenika osigurava kantonalna komisija iz određenoga područja, u skladu s određenim NPP-om, na osnovu prikupljenih prijedloga koje može dostaviti: škola, pojedini nastavnik, pedagoška ustanova, strukovno udruženje, nevladina organizacija i sl., uz poštovanje tajnosti.

(5) Testovi za takmičenje učenika moraju biti recenzirani i lektorisani, na jednom od službenih jezika i pisama – bosanskom jeziku, ili hrvatskom jeziku, ili srpskom jeziku, u skladu s Ustavom.

(6) Uz takmičarske zadatke na svim nivoima takmičenja učenika, moraju biti dana rješenja, odnosno ključ bodovanja učeničkih radova i način rangiranja pojedinaca i ekipa, učesnika u takmičenju.

(7) Uz svako pitanje mora biti upisan maksimalni broj bodova te ucrtano mjesto za upisivanje ostvarenih bodova, npr.

10

Član 20.

(Tajnost takmičarskih zadataka i čuvanje učeničkih radova)

(1) Na svim nivoima takmičenja učenici rješavaju testove / zadatke pisano, usmeno (čiji se odgovori vrednuju bodovima) i / ili izvođenjem eksperimenata i / ili radnih operacija te umjetničkom produkcijom, kao i prezentacijom portofolija i istraživačkih radova.

(2) Takmičarska komisija za pojedini nivo takmičenja učenika odgovorna je za tajnost takmičarskih zadataka do početka takmičenja, kao i za anonimnost rezultata svih takmičara / ekipa do objave privremene i konačne ljestvice poretka.

(3) Pisani učenički radovi s kantonalnog takmičenja, kao što su makete, modeli, portofoliji, likovni radovi i sl., čuvaju se do kraja tekuće školske godine kod organizatora / domaćina takmičenja, nakon čega se predaju školama iz kojih su učenici, gdje se nagrađeni radovi trajno čuvaju.

Član 21.

(Sastav i obaveze kantonalne komisije)

(1) Kantonalnu komisiju za provedbu kantonalnog takmičenja iz određenoga područja (fizika, matematika i sl.) ili kantonalne smotre imenuje Ministarstvo prema određenom NPP-u i kantonalnom planu takmičenja i smotri za slijedeću kalendarsku godinu, na osnovu prijedloga koji dostavlja aktiv direktora škola.

(2) Kantonalna komisija imenuje se svake godine.

(3) Kantonalna komisija za određeno područje sastoji se od najmanje tri člana za provedbu određenog takmičenja u znanju, prema određenom NPP-u, od čega većina moraju biti učitelji ili nastavnici u osnovnoj, odnosno srednjoj školi.

(4) Učitelj ili nastavnik koji je član kantonalne komisije a izrađuje zadatke za takmičenje, ne smije biti učenikov mentor u kategoriji za koju izrađuje zadatke, bez obzira na nivo takmičenja.

(5) Učitelj ili nastavnik ne može biti član kantonalne komisije takmičenja ili smotre u kategoriji ili području u kojem učestvuje kao učenikov ili grupni mentor. Kategorije ili područja propisuju se pravilima / kriterijima pojedinog takmičenja.

(6) Kantonalna komisija za provedbu smotre sastoji se od najmanje pet članova, od kojih jedan može biti iz Ministarstva, a imenuju se direktori osnovnih i / ili srednjih škola te, prema potrebi, i istaknuti stručnjaci iz pojedinog područja.

(7) Članovi komisije moraju biti stručna i odgovorna lica koja ni na koji način ne smiju biti u sukobu interesa te koja će aktivno i savjesno učestvovati u radu kantonalne komisije, pridržavajući se sadržaja određenoga NPP-a i svih zadanih rokova.

(8) Članstvo u određenoj kantonalnoj komisiji može prestati odlukom ministra obrazovanja, nauke, kulture i sporta (u daljnjem tekstu: ministar) i / ili protokom roka na koji je komisija imenovana.

Član 22.

(Poslovi kantonalne komisije)

Članovi kantonalne komisije:

- izrađuju prijedlog kriterija / pravila takmičenja ili smotre;
- dužni su osigurati pisane zadatke / testove za određeni nivo takmičenja, prema sadržaju i programu određenoga NPP-a;
- dužni su osigurati recenziju za pisane zadatke / testove za određeni nivo takmičenja iz svoga područja;
- ispravljaju pisane zadatke / testove na određenom nivou takmičenja za koji su imenovani;
- provode takmičenje ili smotru za koju ih je Ministarstvo imenovalo, u skladu s odlukom i pravilima;
- utvrđuju kriterije vrednovanja;
- obavljaju stručno-tehničke poslove u vezi s takmičenjem / smotrom;
- osiguravaju tajnost zadataka;
- analiziraju sve dijelove takmičenja ili smotre na osnovu kojih donose zaključke i preporuke koje prosljeđuju Ministarstvu;
- izrađuju izvještaje o provedenom takmičenju ili smotri koje u zadanom roku dostavljaju Ministarstvu;
- obavljaju ostale poslove koji proizlaze iz specifičnosti takmičenja i / ili smotre, a obuhvaćeni su odlukom / rješenjem o imenovanju pojedine komisije.

DIO ŠESTI – ULOGA NASTAVNIKA / MENTORA,
PROGRAM I RED NA TAKMIČENJU I SMOTRI
UČENIKA

Član 23.

(Uloga i obaveze nastavnika / mentora)

Nastavnik / mentor:

- priprema učenike za pojedini nivo takmičenja i smotru, kroz redovnu, dodatnu i izbornu nastavu te slobodne aktivnosti učenika;
- odgovoran je za sigurnost učenika za vrijeme putovanja na takmičenje i smotru i u povratku s takmičenja i smotre, uz pisanu saglasnost učenikovih roditelja / staratelja za učešće na tom takmičenju i smotri;
- učestvuje u radu takmičarske komisije;
- predlaže zadatke takmičarskoj komisiji, uz diskreciju i tajnost materijala.

Član 24.

(Red na takmičenju i smotri učenika)

(1) Takmičarska komisija, u saradnji s domaćinom (školom) određenoga nivoa takmičenja i smotre, programom takmičenja i smotre propisuje:

- vrijeme početka i završetka rada učenika na rješavanju takmičarskih zadataka;
- raspored prostorija i opreme za takmičenje i smotru učenika;
- dežurstvo nastavnika za nadzor nad radom učenika;
- vrijeme za arbitražu nakon objavljenih preliminarne rezultata i prikupljenih mogućih prigovora;
- pomoćna sredstva (opremu, pribor, materijal, instrumente i sl.) kojima se takmičari mogu koristiti za vrijeme rada.

(2) Domaćin (škola) je obavezan osigurati: adekvatnu učionicu, dvoranu, sportski teren, svlačionicu, prostor za komisiju, osvježenje za učenike i nastavnike i sl., u zavisnosti od vrste i specifičnosti takmičenja i smotre te redarstvenu službu radi sigurnosti učenika.

Član 25.

(Rješavanje žalbi)

(1) Na kantonalnoj smotri nema ljestvice poretka, već komisija, čija je odluka konačna, proglašava najuspješnije škole (po jednu osnovnu i srednju školu) za daljnje učešće na višem nivou, što se objavljuje na mrežnoj stranici Ministarstva.

(2) Odmah nakon završetka takmičenja na kantonalnom nivou, nakon saopćenja konačnih rezultata, učesnik takmičenja ili ovlašteni predstavnik ima pravo na žalbu ako smatra da određeni rad zaslužuje više ili manje bodova.

(3) Žalba se prosljeđuje, u pisanom obliku, predsjedniku takmičarske komisije koja ju je dužna razmotriti i riješiti u roku od jednog sata od momenta njezina primitka, ako je u mogućnosti.

(4) Ako se radi o složenijem problemu koji nije moguće riješiti u predviđenom roku, komisija je dužna, u roku od dva dana nakon dobivene žalbe (izuzimajući neradne dane), razmotriti problematiku i pisanim putem dostaviti odgovor školi iz koje su takmičari, s obrazloženjem svoga stava, te objaviti konačnu ljestvicu poretka rezultata.

(5) Ako je nakon konačne odluke takmičarske komisije učesnik takmičenja ili ovlašteni predstavnik nezadovoljan odlukom komisije, može, u roku od dva dana od dana primitka pisanog odgovora, podnijeti žalbu Ministarstvu koje će osnovati komisiju, u roku od dva dana od zaprimanja žalbe (izuzimajući neradne dane), od najmanje tri člana, za rješavanje žalbe te, u roku od dva dana, donijeti konačnu odluku o ljestvici poretka.

(6) U slučaju revizije ljestvice konačnoga poretka koju je objavila komisija, Ministarstvo je dužno, u roku od dva dana, objaviti revidiranu ljestvicu konačnoga poretka na mrežnoj stranici Ministarstva, i o tome obavijestiti kantonalnu komisiju čija je ljestvica poretka revidirana.

DIO SEDMI – POHVALE I NAGRADE

Član 26.

(Pohvale i nagrade za osvojeno mjesto)

(1) Za osvojeno I., II. i III. mjesto na školskom i općinskom takmičenju učenika, učenike se nagrađuje diplomom i / ili nekom odgovarajućom prigodnom nagradom,

darom, dok ostali učesnici takmičenja i smotre dobivaju pohvalnice, a domaćin i mentori dobivaju zahvalnice.

(2) Domaćin takmičenja i smotre učenika može nastavnicima / mentorima učenika takmičara i učesnika smotri dodijeliti pohvalnice / priznanja za trud na ostvarenju ciljeva i potporu kvalitetu takmičenja i smotre.

(3) Na kantonalnom takmičenju i smotri kojima je organizator Ministarstvo dodjeljuju se novčane naknade za tri prvoplasirana mjesta, kako slijedi u Tabeli 1.

Tabela 1.

Redni broj	Osvojeno mjesto	Iznos naknade za učenika, pojedinačno (u KM)	Iznos naknade za ekipni plasman (u KM)	Naknada za nastavnika / mentora (u KM)
1.	I. mjesto	100,00	300,00	200,00
2.	II. mjesto	70,00	200,00	150,00
3.	III. mjesto	50,00	100,00	100,00

(4) Ministar će odobriti raspodjelu finansijskih sredstava za određeno takmičenje i smotru na osnovu finansijskoga plana domaćina koji je određenu aktivnost evidentirao kroz godišnji plan i program škole i koja je uključena u kantonalni plan i kalendar školskih takmičenja i smotri.

Član 27.

(Sadržaj diploma / priznanja i potpisivanje)

(1) Na diplomi / priznanju upisuje se ime i prezime učenika, naziv škole i grada / općine, osvojeno mjesto na takmičenju i područje takmičenja.

(2) Diplome, priznanja, pohvalnice i zahvalnice:

a) za kantonalno takmičenje i smotru potpisuje ministar, na desnoj strani obrasca;

b) za školsko i općinsko takmičenje i smotru, ako je općina pokrovitelj, potpisuje općinski načelnik općine u kojoj se održava takmičenje i / ili smotra, na desnoj strani obrasca, a na lijevoj strani obrasca domaćin takmičenja, direktor škole;

c) izrađuje domaćin, s logom Ministarstva;

d) za kantonalno takmičenje i smotru, dostavljaju se u Ministarstvo na uvid, odobrenje, potpisivanje i pečatanje, najmanje sedam dana prije takmičenja i smotre.

DIO OSMI – TAKMIČARSKI PROGRAMSKI SADRŽAJI

Član 28.

(Takmičarski programski sadržaji)

Za sve razrede i sve nivoe takmičenja učenika, testovi i zadaci trebaju omogućiti maksimalno izražavanje znanja, vještina, sposobnosti i umijeća učenika te moraju biti primjereni njihovoj razvojnoj dobi, kao i usklađeni s određenim NPP-om, tj. ne smiju sadržavati sadržaje koji do određenoga nivoa (školskoga, općinskoga, kantonalnoga) nisu obrađeni.

Član 29.

(Evidentiranje takmičenja i smotri u GPR-u škole)

Učešće na svim nivoima takmičenja i smotri mora proizlaziti iz redovnog školskog programa i vannastavnoga i individualnog rada koji se provodi tokom školske godine i

sastavni je dio GPR-a škole određenog NPP-a, kojim se na početku školske godine utvrđuje: broj grupa, vrijeme i mentori.

DIO DEVETI – FINANSIRANJE TAKMIČENJA I SMOTRI UČENIKA

Član 30.

(Osiguranje finansijskih sredstava)

(1) Sredstva za provedbu školskih takmičenja i smotri učenika osigurava škola, odnosno organizator / pokrovitelj. Sredstva za općinsko / međuopćinsko takmičenje i smotru učenika osigurava škola, odnosno organizator / pokrovitelj.

(2) Sredstva za kantonalno takmičenje i smotru učenika osigurava Ministarstvo u skladu s odobrenim finansijskim planom i troškovnikom takmičenja, a za međukantonalno takmičenje i smotru organizator / pokrovitelj.

(3) Sredstva za takmičenje i smotru, pojedinačno ili ekipno na federalnom, državnom ili međunarodnom nivou takmičenja i smotri učenika osigurava Ministarstvo, u skladu s odobrenim finansijskim planom i troškovnikom takmičenja.

Član 31.

(Izvori finansijskih sredstava)

Izvori sredstava za takmičenja i smotre učenika su:

- sredstva Budžeta Srednjobosanskog kantona planirana za takmičenja i smotre;
- sredstva za materijalne troškove škola;
- sredstva sponzora, donatora i pokrovitelja;
- sredstva iz vanrednih prihoda škole.

Član 32.

(Izrada finansijskoga plana / troškovnika)

(1) Svako takmičenje i smotra koje se organizuje kao kantonalno mora sadržavati finansijski plan i troškovnik takmičenja i smotre, za što Ministarstvo daje saglasnost.

(2) Sredstva za troškove kantonalnog takmičenja i smotre učenika obuhvaćaju:

- troškove organizacije predviđene finansijskim planom i odobrenim troškovnikom takmičenja;
- nepredviđene troškove koje odobrava Ministarstvo na prijedlog škole domaćina.

Član 33.

(Finansiranje viših nivoa takmičenja i nagrade)

(1) Sredstva za troškove takmičenja i smotre učenika na višem nivou od kantonalnog nivoa obuhvaćaju sljedeće troškove (ako su takmičenja van Kantona):

- putne troškove i dnevnice, u skladu s propisima;
- troškove pripremanja materijala, opreme i sl. za takmičenje učenika;
- nagrade za ostvaren izniman uspjeh na takmičenju ili smotri.

(2) Najkasnije sedam dana nakon održanog takmičenja učenika i povratka učenika, nastavnik / mentor takmičara / škola podnosi Ministarstvu izvještaj o rezultatima takmičenja i utrošenim sredstvima (dokaze, račune, specifikacije).

Bojan Domić, s. r.

